

## Sejarah Syariat Islam dan Perkembangan

Di dalam keluaran yang telah lalu telah disiarkan perkembangan syariat Islam terutamanya dalam masa Nabi Muhammad (S.A.W) masih hidup dan membawa sedikit dalam masa Saiyidina Abu Bakar dan Saiyidina Umar mulai memegang tampuk kekuasaan. Dengan sendirinya masa itu keadaan umat Islam belum begitu meluas dan belum banyak dimasuki oleh keadaan-keadaan yang setempat mengelilinginya yang sedikit sebanyak ada pengaruhnya ke dalam perkembangan syariat Islam itu. Sekarang bacalah sambungan seterusnya. –

(2)

Setelah Rasulullah (S.A.W) wafat daerah kekuasaan umat Islam semakin luas dan lebar. Dalam masa pemerintahan dikendalikan oleh Saiyidina Umar bin al-Khattab Jazirah Arab yang menjadi pusat Islam sekarang telah didampingi oleh negeri-negeri yang baru dan besar dari segenap penjuru; Syria (17 H.), Iraq bekas jajahan Parsi (17 H.), Mesir (20 H.) dan Parsi (21 H.). Gabungan di antara negeri itu berjalan dengan sangat lancarnya.

Sesuai dengan perkembangan kekuasaan Islam ini, Saiyidina Umar mendaftarkan setiap orang dari umat Islam. Mereka diminta tidak menentukan pekerjaannya sendiri, sebab negara dan pertahanannya, juga perkembangan Islam, meminta gunakan yang luar biasa sesuai dengan hajat pertahanan dan negara masa itu. Oleh yang demikian di antara umat Islam yang sudah di tentukan daerah “kerjanya” dalam lapangan pertahanan dan perkembangan agama terutamanya ditentukan kepada ulama-ulama yang hafal Qur’an, *Muḥaddithīn* (ahli hadith), dan *fuqahā’*- *fuqahā’* iaitu mereka yang disuruh berpindah dengan membawa tugas mengembangkan agama.

Di tempat yang baru ini mereka banyak menemui adat dan masyarakat yang belum pernah dikenal di Jazirah Arab. Daripada perkembangan islam ini, mereka banyak menemui

keadaan-keadaan yang sulit, berlainan dan sebagainya yang perlu di selesaikan dengan secara hukum. Kejadian-kejadian sehari-hari terutamanya adalah menjadi perkara kesulitan yang dihadapi mereka di dalam mana umat Islam sebagai orang yang baru dan rakyat negari sebagai orang yang lama.

Sesuai dengan perkembangan kebudayaan masa itu sudah tentu setiap negara mempunyai adat sendiri, masyarakat mempunyai akhlak sendiri, demikian juga pertadbiran kewangan dan perniagaan mempunyai susunan sendiri. Umpamanya di daerah bekas kekuasaan Parsi – mereka mempunyai adat dan susunan yang berbentuk Parsi dalam segala hal kerana mereka telah lama tenggelam dalam kebudayaan itu. Mesir dan Syria mempunyai tatatertib dan tradisi dalam pemerintahan, perniagaan, masyarakat dan sebagainya yang berjiwa dengan peraturan-peraturan orang-orang Rom. Sebaliknya di Semenanjung Tanah Arab terdapat golongan-golongan badwi yang lepas daripada kemajuan dan tamadun Parsi, Rom dan lain-lain yang sama sekali tidak ada hubungannya dengan Tanah Arab.

Susunan-susunan pemerintahan negara, masyarakat dan hukum yang didapati di dalam negara-negara tersebut adalah mempengaruhi jiwa rakyatnya. Setelah Islam masuk ke sana banyaklah berlaku hal-hal dan soal-soal yang sama sekali belum

terdapat nasnya dengan tertulis di dalam salah satu ayat al-Quran atau hadith-hadith Nabi (S.A.W) bahkan sebelum itu hal-hal tersebut belum pernah berlaku sama sekali. Bagi menyelesaikan persoalan-persoalan ini, ulama-ulama dan fuqahā' berusaha berijtihad menggunakan kekuatan otaknya untuk menyelesaikan soal-soal tersebut. Adalah tidak baik bagi pemerintahan Islam kalau sesuatu hal tidak dapat diselesaikan terutamanya mengenai ketenteraman dan kebaikan masyarakat. Ulama dan fuqahā' hendaklah menggunakan fikirannya di dalam kawasan yang dapat persaksian dari nas-nas al-Qurā'n dan Sunnah Rasul yaitu memberi pendapat yang jiwanya ada di dalam al-Qurā'n atau Sunnah Rasul – bukan fikiran atau pendapat yang terlepas sama sekali daripada kedua-dua dasar agama itu.

Demikianlah jalan keluar yang telah ditempo oleh ulama dan fuqahā' yang *mujtahidīn*. Sekalipun begitu terkadang-kadang mereka berpengaruh juga dengan lingkungan masyarakat tempat mereka menetap atau bertugas. Umpamanya sahabat-sahabat yang ditempatkan di Iraq di dalam mereka berijtihad memutuskan soal-soal yang dihadapkan kepada mereka yang nasnya di dalam al-Qurā'n dan al-ḥadīth terkadang-kadang terpengaruh oleh adat istiadat orang yang berjalan beberapa lamanya yang mempunyai undang-undang dan peraturan negeri yang khusus. Demikian itulah juga sahabat-sahabat yang bertugas di Mesir dan di Syria. Mereka terpengaruh dengan apa yang mereka lihat dan apa yang terdapat di dalam masyarakat itu.

Yang demikian, ulama-ulama dan fuqahā-fuqahā' itu mengetahui, bahawa Islam datang tidak untuk meruntuhkan segala kebudayaan, akhlak, adat istiadat manusia lalu mendirikan kebudayaan adat dan akhlak yang lain di atas runtuhannya yang tersebut. Islam melihat segala sesuatu dari segi manfaat dan mudaratnya. Mana baik dan manfaat oleh Islam dan dijadikannya sebahagian daripada syariatnya, mana yang tidak baik dan memberi mudarat dilarang dan

diharamkan. Mana-mana yang dapat diperbaiki dan dibersihkan kemudian supaya dapat dipakai dan berguna bagi masyarakat.

Dengan dasar inilah agama menetapkan ibadah haji dan dijadikan salah satu Rukun Islam yang lima sesudah ibadah haji itu terlebih dulu dibersihkan daripada ibadah-ibadah yang berjiwa kepercayaan menyembah berhala.

Islam juga menetapkan undang-undang kahwin, talak, *'iddah* dan berbagai-bagai jenis jual beli dan lain perkara muamalah – semuanya dibuat dengan lebih dulu dibersihkan daripada unsur-unsur yang merugi dan membahayakan lahir dan batin manusia. Bersamaan dengan itu pula, Islam mengharamkan arak, judi, riba' dan memakan sebahagian haiwan. Wanita-wanita pula diberi hak-hak yang sama sekali tidak didapati mereka pada zaman Jahiliyah.

Ulama dan fuqahā serta lain-lain ahli agama Islam telah mengetahui sekalian undang-undang dasar ini sebelum mereka melangkah ke daerah-daerah baru yang dimasuki oleh Islam. Mereka mengetahui dan menginsafi bahawa syariat Islam telah menentukan garis dalam hal ini dan mereka tidak mengetahui bahawa syariat Islam seluruhnya adalah dari Tuhan. Tidaklah menjadi salah kalau mereka itu setelah mempelajari semua peristiwa dan berbagai-bagai keadaan manusia di mana mereka itu berada memberikan hukuman-hukuman yang belum ada nasnya di dalam Qur'an atau hadith, menentukan mana yang boleh dan mana yang terlarang kepada masyarakat itu. Hukuman-hukuman yang diambil itu didasarkan mereka dari dasar-dasar syariah yang dapat jiwanya kepada setiap hukum yang telah diberi nas di dalam Qur'an atau Sunnah.

(bersambung)

